



«SDG Pioneers» ҚОРЫТЫНДЫСЫ

Сенат депутаты Руслан Рүстемов Алматы қаласында «Орталық Азиядағы Орнықты даму мақсаттарына қол жеткізу пионерлері (SDG Pioneers)» байқауының жеңімпаздары мен қатысушыларын марапаттау рәсіміне қатысты. Іс-шараны БҰҰ-ның Қазақстан мен Орталық Азиядағы жаһандық шарты ұйымдастырған.

Сенатор Рүстемов сарапшылармен, ұйымдастырушыларымен әңгіме барысында мемлекеттің билік буындарын трансформациялау арқылы елімізде жүзеге асырып жатқан реформалары туралы айтып берді. Ел басшысының әлеумет-



тік-экономикалық өмірді жақсарту мақсатында денсаулық сақтау, білім беру, әлеуметтік саясат, қоршаған ортаны қорғау саласында қабылдап жатқан стратегиялық маңызды шешімдері туралы да сөз болды.

«Қазақстан тәуелсіздіктің алғашқы күнінен бастап БҰҰ мен оның мамандандырылған мекемелерінің жұмысына белсенді қатысып келе жатқаны баршаға белгілі. Бұл ынтымақтастық – мемлекетіміздің сыртқы саясатындағы басым бағыттардың бірі. Қазақстанның халықаралық аренадағы жаһандық және өңірлік қауіпсіздік саласындағы стратегиялық мүдделерін қамтамасыз ету, орнықты дамудың негізін жасау, әлем қоғамдастығының мүшелері арасындағы қатынастарды үйлестіру – бұл қызметтің басты міндеттері», деді сенатор.

Депутат сарапшылармен пікірталас барысында Орнықты даму мақсаттарын іске асыруда, атап айтқанда, жасанды интеллект құралдарын пайдалану арқылы проблемаларға мониторинг жүргізу және зерделеу үшін жаңа цифрлық шешімдер енгізу мәселесіне жеке тоқталды.

Іс-шара қорытындысында сенатор Орнықты даму саласындағы ұлттық мақсаттар мен міндеттерді іске асыру барысын мониторингілеу жөніндегі парламенттік комиссияның атынан ұйымдастырушыларға зор алғысын білдірді. Сондай-ақ қатысушыларға «Орталық Азиядағы Орнықты даму мақсаттарына қол жеткізу пионерлері (SDG Pioneers)» жеңіс марапаты мен сыйлықтарын табыс етті.

«Азия балалары»: Қазақстан құрамасы 107 медаль иеленді



Якутск қаласында VIII жазғы «Азия балалары» ойындары мәресіне жетті.

Спортты дамыту дирекциясы мәлім еткендей, «Туймаада» стадионында өткен салтанатты жабылу рәсімінде жүлде алған барлық спорт-

шымыз шеруде сап түзеп өтті.

Аталған кешенді жарыста Қазақстан құрамасы 17 алтын, 31 күміс, 59 қола, барлығы 107 медальмен жалпы есепте 7-орынға тұрақтады.

«Созақ үні»-ақпарат.



Мемлекет басшысы академик Мұхтар Құл-Мұхаммедті қабылдады

Президент Қасым-Жомарт Тоқаев қоғам қайраткері, академик Мұхтар Құл-Мұхаммедті қабылдады.

Кездесу барысында Қазақстанның ғылымы мен мәдениеті, мемлекеттік және ақпараттық қауіпсіздігі, сондай-ақ халықаралық ынтымақтастық мәселелері талқыланды.

Академик жақында өткен Шанхай ынтымақтастығы ұйымы саммитінде Мемлекет басшысының қауіпсіздікті нығайту, бейбітшілікті,

тұрақтылық пен орнықты дамуды қамтамасыз ету жөніндегі бастамаларына қолдау білдірді. Мұхтар Құл-Мұхаммед әлемдегі түрлі қақтығыстарды реттеу және олардың алдын алудағы орта держава ретінде танылған Қазақстанның рөлі арта түскендігін айтты. Сонымен қатар саммитте қабылданған Астана декларациясы мен жиырмадан астам құжаттың әлемдегі қауіпсіздік пен ынтымақтастықты одан әрі нығайтуға

зор үлес қосатынын жеткізді.

Қасым-Жомарт Тоқаев тең құқылы серіктестікке негізделген тиімді аймақтық ықпалдастықты қамтамасыз ету мақсатында Қазақстанның көпжақты ынтымақтастығының маңызын атап өтті. Президенттің айтуынша, халықтар мен мемлекеттер арасындағы өзара сенім мен тату көршілікті нығайтуда қоғамдық дипломатия ерекше рөл атқара алады.

Эквадордағы Тоғызқұмалақ

Тоғызқұмалақ ойынын Эквадорда сүйіп ойнайтын азаматтар бар. Кейінгі бір жылда халық өз еркімен үйірме ашып, қазақтың ойынын дәріптеп жүр.

Хуан Карлос тоғызқұмалаққа қызыққаны сонша, арнайы тақтасы болмаса да, ойнаудың амалын тапқан. «Өз тақтам болмаған соң, жапонның го ойынының тастарын алдым да, ойын карталарын отау етіп тізіп қойдым. Ал ақ тастарды тұздықты белгілеу үшін қолданамын. Бір жағына қызыл карталарды, екінші жағына қара карталарды қойып, кімнің бастаушы, кімнің қостаушы екенін де шешуге болады», дейді ол. Бұл елге тоғызқұмалақты әкелген – колумбиялық Херман Гонзалес есімді азамат. Олар ойынымызды Эквадордағы жалпыхалықтық ойын еткісі келеді екен. Талабымыз да, талантымыз да бар, тақтамсыз жоқ дейді.



Ұлттық кітап күні белгіленді

Қазақстанда жаңа мереке пайда болды. Үкімет қаулысымен 23 сәуір Ұлттық кітап күні болып белгіленді. Бұл туралы Мәдениет және ақпарат министрлігінің баспасөз қызметі жариялады.

Мемлекет басшысы үшінші Ұлттық құрылтайда кітап күніне байланысты тапсырма бергені белгілі. Осылайша, атаулы дата елдегі мереке күндерін толықтырады. «Шын мәнінде, озық ойлы ұлт болудың ең төте жолы – кітап оқу. Сондықтан кітап оқу мәдениетін қоғамда барынша орнықтыруымыз керек», деген Президент сөзінде.

Мәдениет және ақпарат министрі Аида Балаева Face-book парақшасында атаулы

күнге орай үздік кітаптарға арналған «Ұлттық кітап» байқауы жарияланғанын хабарлады.

Байқауда «Балаларға арналған үздік кітап», «Жасөспірімдерге арналған үздік комикс кітабы», «Нон фикшн (психологиялық, мотивациялық, бизнес) бағытындағы үздік кітап», «Детектив жанрындағы үздік кітап», «Сатира жанрындағы үздік кітап», «Үздік иллюстрациялық кітап», «Үздік аударма кітабы», «Ең көп оқылған кітап», «Фэнтези жанрындағы үздік кітап», «Үздік баспа» аталымдары бойынша жеңімпаздар анықталады. Сондай-ақ «Жыл кітабына» гран-при сыйлығы табысталадыны айтылған.